



Pisortat namminersortullu suliffeqarfiini atorfinerlaat 30-it inorlugit ukiullit tamarmik kiisalu atorfinerlaat killilimmik pisinnaasallit tamarmik qaammatini arfinilinni siullerni atorfeqarnerminnut atatillugu siunnersorteqartinneqalissappata/ikorfartorteqartinneqalissappata tamatuma iluaqutissartai ajoqutissartaalu allaaseralugit Naalakkersuisut nassuiaasioqullugit peqquneqarnissaanik Inatsisartut aalajangiiffigisassaattut siunnersuut. Taamatut aaqqissuussisoqarpat tamatuma pisortanut namminersorlutillu inuussutissarsiuteqartunut qanoq akeqarsinnaaneranik naatsorsuinernik nassuiaat imaqassaaq.

(Inatsisartunut ilaasortaqaq Anna Wangenheim, Demokraatit)

(Siullermeerneqarnera)

Qujanaq Demokraatit Inatsisartunut ilaasortaataitaannut Anna Wangenheim-imut siunnersuummut pitsaasumut tapersersortarialimmullu.

Siunnersuut pissusissamisoorpoq maannakkumullu naapertuulluni, imminut assortuuttumi inissisimagatta, nunanit allaniit sulisussanik isumalluuteqaraluttuinnaratta uffa, inuusuttorpassuit inuillu innarluutillit, suliffeqanngitsut. Tassani aaqqiissutissanik nassaartariaqarpugut, taakkuninnga inuiaqatigiitsinni ikiorsiissutaasinnaasunik suliffeqarsinnaaneranut. Tassani ikorfartorteqarnissaaq pingaaruteqarsinnaavoq, tamanna aqutigalugu atorfinerlaat suliffeqarfinni ikiorsinnaagatsigit tassungalu ilutigalugu suliffeqarfinni naleqqussarnissaannut nukittorsarlugit.

Inuusuttut inuillu innarluutillit atorfininnerminni aallartilluarnerat taakkunungaannaangitsoq iluaqutaasussaavoq – aammali inuiaqatigiit siunissaannut aningaasaliinerulluni. Ikorfartorteqarnerup atorfinerlaat tigummiinnarnissaannut suleqataasinnaapput, suliffeqarfimmik toqqissisimasumik peqqinnartumillu pilersitsillutik sulinermilu ajoqusernissaaq pinaveersaartillugu. Inuup ataatsip atugarissaarnera nukittorsaannarnagu, aammali suliffeqarfiit periarfissinneqassapput sulisumik pikkorissut tigummiinnarnissaannut ineriartortinnissaannullu.

Ikorfartorteqarneq allatut oqaatigalugu siumut isigaluni aningaasaliineruvoq, suliffeqarfiutitsinnut ikorfartuutaallunilu inuiaqatigiinni isumaginninnikkut akisussaaffeqarnitsinnut nukittorsaataasoq.

Demokraatini tamanna tunngavigalugu siunnersuut tamakkiisumik taperserparput, uani Inatsisartut akuerissappassuk isummerfigisassatut tunngavissamik patajaattumik tunineqassagatta, qanoq ililluta ikorfartorteqarneq pilersissinnaaneripput siunissamilu aaqqissuussinnaaneripput, tamatsinnut iluaqutaasussamik.

Siunnersuut taamatut oqaasertalerlugu akuereqqullugu innersuunneqarpoq ataatsimiititaliamilu susassaqartumi suliareqqinnissaa innersuussutigineqarluni.